

दिनांक 01.02.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- वित्त मंत्री निर्मला सीतारमण माली साल 2025-26 रो केन्द्रीय बजट पेश कीनो- सालाना 12 लाख रुपया ताई री आमदनी माथे कोई टैक्स नी लागेला।
- खेती-बाड़ी री उपज अर फसल विविधीकरण ने बधावो देवण सारु चुण्णी ज्या सौ जिलां मांय 'प्रधानमंत्री धन-धान्य कृषि योजना' चलाई जावेला।
- "मेक इन इंडिया" पहल ने बधावो देवण सारु राष्ट्रीय विनिर्माण मिशन चलायो जावेला।
- प्रधानमंत्री नरेन्द्र मोदी बजट ने विकसित भारत रो संकल्प मजबूत करण वाळो बतायो- विपक्ष रा नेता बजट निराश करण वाळो बतायो।
- मुख्यमंत्री भजनलाल शर्मा केन्द्रीय बजट ने जनता री उम्मीदां माथे खरो उत्तरण वाळो बतायो।
- आरएस प्री-2024 परीक्षा काल-परीक्षा केन्द्रां ऊं 100 मीटर दूर ताई रा साइबर कैफे अर ई-मित्र बंद राखण रा हुकम दिया ज्या।
- जयपुर मैराथन काल व्हेला-स्थानीय जनता समेत 25 देशां रा धावक शिरकत करेला।

000

केन्द्रीय वित्त मंत्री निर्मला सीतारामन आज संसद मांय माली साल 2025-26 रो बजट पेश कीनो। ओ एनडीए रा राज रा तीजा कार्यकाल रो पहलो बजट है। एनडीए सरकार रो लगातार आठवों बजट पेश करता थकां वित्त मंत्री कह्यो के म्हाणी माली व्यवस्था दुनिया री सगळी माली व्यवस्थावां मांय सब ऊं तेज बधोतरी वाळी व्यवस्था है।

वित्त मंत्री कह्यो के नुवी टैक्स व्यवस्था रा तैत अब 12 लाख रुपया सालाना ताई री आमदनी परां टैक्स नी देवणो व्हेला। नौकरी-पेशा करदातावां सारु 75 हजार रुपया री मानक कटौती सागे आ सीमा 12 लाख 75 हजार रुपया व्हेला। टैक्स देवण वाळां रा फायदा सारु सगळी श्रेणियां मांय टैक्स स्लैब अर वां री रेट मांय बदलाव रो प्रस्ताव है।

वित्त मंत्री स्रोत माथे कर कटौती- टीडीएस री रेट अर सीमा री तादाद कम करण रो प्रस्ताव कीनो। बुजुर्गां ने अब ब्याज ऊं एक लाख रुपया ताई री कमाई माथे कोई टैक्स नी देवणो व्हेला। किराया माथे टीडीएस कटौती सारु सालाना आमदनी री सीमा दो लाख चालीस हजार रुपया ऊं बधा र छह लाख रुपया करण रो प्रस्ताव करी ज्यो है। वित्त मंत्री कह्यो के कर व्यवस्था ने आसान अर और साफ बणावण सारु सरकार नुवो इन्कम टैक्स बिल पेश करेला।

पेश है बजट री खास बातां-

- खेती री उपज अर फसल विविधीकरण ने बधावो देवण सारु चुण्णी ज्या 100 जिलां मांय 'प्रधानमंत्री धन-धान्य कृषि योजना' चलाई जावेला।
- दलहन मांय खुद रे पाण ऊबा व्हेवण सारु छह साल रो मिशन सारु कर्यो जावेला।
- किसान क्रेडिट कार्ड रे जरिये कर्ज लेवण री सीमा 3 लाख ऊं बधा र 5 लाख रुपया करीजी।

- एमएसएमई क्रेडिट गारंटी कवर ने पांच करोड़ ऊं बधा र 10 करोड़ रुपया करण रो प्रस्ताव।
- **“मेक इन इंडिया”** पहल ने बधावो देवण सारु राष्ट्रीय विनिर्माण मिशन चलायो जावेला।
- भारत ने खिलौनां रो वैश्विक केन्द्र बनायो जावेला।
- बीमा हलका सारु प्रत्यक्ष विदेशी निवेश—एफडीआई री सीमा 74 ऊं बधा र सौ फीसदी करण रो प्रस्ताव।
- 36 और जीवनरक्षक दवाइयां ने बेसिक कस्टम ड्यूटी ऊं पूरी तरह छूट दी जावेला।
- गांवाई हलकां री सगळी सरकारी सैकण्डरी स्कूलां अर प्राथमिक स्वास्थ्य केंद्रां माथे ब्रॉडबैंड कनेक्टिविटी मुहैया कराई जावेला।
- रेहड़ी—पटरी वाळां सारु पीएम स्वनिधि योजना ने नुवो रूप दियो जावेला।
- आईआईटी मांय साढे छह हजार अर मेडिकल कॉलेजां मांय दस हजार और सीटां जोड़ी जावेला।
- देश मांय राज्यां री भागीदारी सागे सैर—सपाटा री 50 बेहतरीन ठोडां विकसित करी जावेला।
- क्षेत्रीय कनेक्टिविटी स्कीम उडान रा तैत आवता दस साल मांय 120 और ठोडां सारु हवाई सेवा सुरु करी जावेला।
- जनजीवन मिशन ने साल 2028 ताई चलायो जावेला।
- राज्यां री भागीदारी ऊं तरकारियां अर फलां सारु मोटो कार्यक्रम चलावण रो ऐलाण।
- इंडिया पोस्ट पेमेंट बैंक री मदद ऊं गांवाई हलकां मांय माली व्यवस्था ने तेज करी जावेला।
- उद्यम पोर्टल माथे पंजीकृत एमएसएमई सारु पांच लाख रुपया ताई री सीमा वाळा खास क्रेडिट कार्ड सुरु कर्या जावेला।
- सगळा ज़िला अस्पतालां मांय डे—केयर कैंसर सेंटर खोल्या जावेला।
- बिजली ऊं चालण वाळी गाड़ियां माथे टैक्स कम करण रो ऐलाण।
- ऑनलाइन प्लेटफॉर्म्स सारु काम करण वाळा गिग वर्कर्स रा ई—श्रम पोर्टल माथे नाम मंडा र वां ने पहचान पत्र दिया जावेला।

000

प्रधानमंत्री नरेंद्र मोदी बेहतरीन बजट पेश करण सारु वित्तमंत्री ने बधाई दीनी है। श्री मोदी कह्यो के ओ बजट भारत री विकास यात्रा मांय मील रो पत्थर साबित व्हेला। श्री मोदी कह्यो के ओ बजट देश रा हर रेहवासी रा सपना पूरा करण वाळो है।

रक्षा मंत्री राजनाथ सिंह बजट ने ऐतिहासिक बताता थकां कह्यो के ओ बजट नौजवानां, गरीबां, किसानां, महिलावां समेत समाज रा सगळा तबका अर हलकां रा विकास ने बधावो देवण वाळो है। श्री सिंह रक्षा बजट बधावण रो स्वागत करता थकां कह्यो के इण ऊं पैली वाळा फौजियां अर पेंशन लेवण वाळां ने फायदो मिलेला।

मुख्यमंत्री भजनलाल शर्मा केन्द्रीय बजट ने जनता री उम्मीदां माथे खरो उतरण वाळो बतायो।

दूजी कानी विपक्ष रा केई नेता बजट ने निराश करण वाळो बताता थकां कह्यो के इण मांय मझला तबका अर नौजवानां सारु कांई नी है। कांग्रेस रा राष्ट्रीय महासचिव अर प्रदेश रा पैली वाळा उपमुख्यमंत्री सचिन पायलट बजट ने राजनीति ऊं प्रेरित अर किसानां री अनदेखी करण वाळो बतायो है। वे कह्यो के बजट मांय किसानां री एमएसपी री मांग ऊं जुड्यो कोई ऐलाण नी करी ज्यो है।

प्रदेश कांग्रेस अध्यक्ष गोविंद सिंह डोटासरा कह्यो के बजट मांय राजस्थान सागे दुभांत करीजी है। वे कह्यो के ईआरसीपी रे राष्ट्रीय परियोजना व्हेवण रो ऐलाण नी करी ज्यो है अर न ही यमुना रा पाणी ऊं जुड्या करार रा बारा मांय कोई ऐलाण करी ज्यो है।

विधानसभा मांय विपक्ष रा नेता टीकाराम जूली कह्यो के केन्द्रीय बजट राजस्थान री उम्मीदां माथे पाणी फेरबा वाळो है। इण मांय किसानां सारु कोई ठोस राहत रो ऐलाण नी करी ज्यो है अर नौजवानां ने रोजगार देवण री कोई योजना नी बनाई ज्यी है।

फिक्की राजस्थान रा अध्यक्ष अशोक कजारिया एमएसएमई सारू क्रेडिट गारंटी कवर बधावण री सराहवणा कीनी है। वे बजट माथे प्रतिक्रिया देता थकां कह्यो के ओ निवेश अर खपत ने बधावो देवण वाळो साबित व्हेला। स्टार्टअप फंडिंग मांय बधोतरी रा ऐलाण ऊं प्रदेश रा नौजवानां मांय उमाव है। पाली रा स्टार्टअप फाउंडर दिनेश उज्जवला कह्यो के इण ऊं खुद रे पाण ऊबा व्हेवण मांय मदद मिलेला।

झुंझुनूं रा चार्टर्ड अकाउंटेंट राहुल भीमराजका कह्यो के अमृतकाल रो ओ बजट बरसां याद राख्यो जावेला।

अजमेर ऊं लघु उद्योग भारती री अध्यक्ष दिव्या सोमानी बजट ने विकसित भारत ओड़ी सुनहरो कदम बतायो।

000

आरएस प्री-2024 परीक्षा काल व्हेला। राजस्थान लोक सेवा आयोग कानी ऊं ली जावण वाळी ई परीक्षा बाबत् प्रदेशभर मांय 2 हजार 45 परीक्षा केन्द्र बणायी ज्या है। इम्तिहान सारू करीब पौने सात लाख उम्मीदवार अर्जी दीनी है। आ परीक्षा दोपहरां 12 बज्यां ऊं 3 बज्यां ताई व्हेला। आरपीएससी रा सचिव रामनिवास मेहता बतायो के उम्मीदवारां रा अंगूठा रा निशाण अर राइटिंग रा नमूना एडमिशन कार्ड माथे लिया जावेला। परीक्षा केन्द्रां ऊं 100 मीटर री दूरी ताई साइबर कैफे अर ई-मित्र परीक्षा रा बगत रे दौरान बन्द करावण रा हुकम दिया ज्या है।

000